




KATEKESE BA LABARIK, HA ORATORIO 2015

Katekese ba Oratorio

Tema ba katekese iha oratorio, ba semá ne'e nian, molok kuarema, mak "Don Bosco no Eukaristia". Sei koalia kona ba Don Bosco nia esperensia no hanorin sira kona ba Eukaristia.

I Eukaristia

Objetivo

Hatene Jezús nia presensa iha hostia santa
Komprede ba komunga ne'e, simu Jezús nia isin
Prepara an didiak molok ba komunga

Prossu

Orasaun: hodi Padre,

Hananu:

EUKARISTIA SAKRAMENTU BOOT TEBES 173

Eukaristia sakramentu boot tebes

Na'i Jesus nia futar isin lolos;
aihan moris ba Nia emar sira
be hakat ba tuir dalan lalehan.
Anju sira hotu no mos santu tomak
halibur an, hana'i, hahi Jesus;
Na'i Jesus hiit An mai lor-loron,
haraik aihan futar Isin no Ran.

Istoria

Primeira Komuniaun

Ha'u tinan sanulu resin ida bainhira ha'u bele simu primeira komuniau. Ha'u hatene ona doutrin iha katesismu kiik tomak, maibe iha tempu neba, labarik sira la bele simu primeira komuniau bainhira sira seidauk halo tinan sanulu resin rua. Tan ami nia uma dook housi parokia, padre paroko la hatene ha'u, ne'e duni ha'u ten ke aprende katekese housi ha'u nia mama. Tan mama lakohi katak ha'u lakon buat folin boot santa relijiaun nian ida ne'e to'o ha'u tinan boot liu tan, nia rasik prepara ha'u tuir nia matenek. Hafoin iha kuaresma laran, nia haruka ha'u ba halo doutrina loron loron. Ikus mai, ha'u prova hau liu, no marka loron nebe labarik sira hotu sei halo sira nia obrigasaun Paskua nian ba dala uluk.

Iha ema lubun boot nia leet, susar duni atu hadook an housi distra-

saun. Bainhira loron besik ona, ha'u nia mam haka'as an tulun ha'u liu tan. Iha kuaresma laran, nia lori ha'u atu konfesa dala tolu. "Joaozinho," nia dehan fila fila, "Maromak prepara ba ó presenti boot ida; prepara ó nia an di-diak, hodi konfesa, keta subar buat ruma, maibe konfesa sala hotu. Hakribi o nia sala hotu, no hakotu lia ba Maromak katak o sei halo an diak liu iha futuru." Ha'u hakotu lia duni, maibe ha'u laran metin ka lae, Maromak mak hatene. Iha uma, inan halo ha'u reza, le'e livru diak, fo konseliu diak nebe inan badinas hatene buka oportunidade ba nia oan sira.

Iha dader neba, nia la husik ha'u koalia ho ema ruma. Nia ba hamutuk ho ha'u ba meja santa no hamutuk ho ha'u, halo preparasaun no agradementu nebe padre vigariu foraneu, Pe. Sismondi, reza hamutuk ho ami ho lian makaas. Iha loron neba, mama lakohi katak ha'u halo serbisu ruma, maibe nia hakarak ha'u le'e no reza deit. Iha buat hirak nebe ha'u nia inan dehan fila fila mai ha'u mak liafuan sira ne'e: "Oan doben, loron ne'e loron boot ba o. Ha'u fiar katak Maromak kaer metin ona o nia fuan. Ohin, hakotu lia ba Nia katak, tuir o bele, o sei haka'as an atu sai diak to'o o nia moris nia rohan. Iha futuru, ba komunga dala barak, maibe hare ba katak o la halo sakrilejiu. Hateten sala hotu bainhira o konfesa, halo tuir nafatin, ba ho laran kmaan ba katesismu no homilia; no halai hanesan housi moras boot housi sira nebe koalia aat."

Perguntas

1. Don Bosco halo primeira kumuniaun ho tinan hira?
2. Se mak hanorin nia, atu halo konfensa?
3. Nia mama, dehan fila fila saida ba nia?
4.

Evan. Mat 14: 13-21

Jesus fo han ba ema barak

¹³Rona tiha João Batista nia mate, Jesus sa'e ba ro ida hodi ba mesak iha rai fuik maran; maibe hatene tiha ne'e, ema lubun boot husik sidade sira hodi la'o tuir buka Nia. ¹⁴Tun housi ro hodi hare ema barak ne'e, Nia hanoin teb-tebes sira hodi fo isin diak ba sira nebe moras. ¹⁵Loraik dau-daun ona, eskolante sira hakbesik ba Nia hodi dehan: "Fatin ne'e rai fuik, no kalan besik ona; haruka ema sira ne'e ba ona, atu sira bele sosa aihan iha knua sira." ¹⁶Nune'e Jesus dehan ba sira: "Sira lalika ba; imi rasik fo han sira ba." ¹⁷Sira hatan ba Nia: "Ami iha deit paun fuan lima no ikan rua." ¹⁸"Lori sira mai," Nia dehan. ¹⁹Hafoin Nia haruka ema lubun boot

tur iha du'ut leten. Nia kaer paun fuan lima no ikan rua ne'e, foti matan ba lalehan hodi fo bensa. Tuir mai Nia silu paun sira ne'e hodi fo ba eskolante sira; hafoin sira fahe ba ema lubun boot. ²⁰Sira hotu han to'o bosu; baluk sira nebe resin, sira tau ba luhu sanulu resin rua nakonu! ²¹Ema sira nebe han hamutuk mane rihun lima, la sura fetu no labarik sira.

Perguntas

1. Jesus sa'e ba ro ba ne'ebé?
2. Ema lubun boot husi sidade halo saida?
3. Jezús halo saida hasoruema lubun boot ne'e
4.

Resumo

Iha istoia ita ohin rona Don Bosco nia esperensia wainhira halo primeira kumuña. Don Bosco atu halo primeira kumuña, uluk nanain nia tuir doutrina, hatene ona tuir ba prova, se pasa iha prova halo primeira kumuña se lae la halo. Maibe tamba Don Bosco matenek, maski doutrina ho nia mama deit katak aprende doutrina iha uma, maibe nia pasa iha prova. Ba ita hotu mos hanesan, se mak hakarak atu halo primeira kumuña, tenki tuir doutrina, prova pasa, nia bele halo primeira kumuña. Se karik katekista bolu deit, la tuir doutrina, selu osan deit, bele halo primeira kumuña, keta tuir katekista ne'e, tamba ne'e sala, la los ida.

Ita la hatene doutrina, aban bain ita ba komunga ho sala, ita hetan Maromak nia kastigo. Nune'e diaak liu ne'e lalika halo, hatene doutrina mak halo.

Iha evanjellu ita rona katak Jesus fo han ba ema barak husi paun fuan lima no ikan rua. Maski husi oituan, nia fo han ba ema barak. Hanesan mos iha oras ne'e, Jezús mesak deit, ema barak iha mundo tomak han nia isin la hotu, tamba nia mak Maromak. Nia fo han ba ema barak ne'e tamba ema ba buka nia. Oras ne'e mos hanesan, se ita ba buka buka Jezús, katak ba misa, Nia sei fo han ita sai bosu hanesan uluk sira bosu.

Ba misa ka simu komunga tenke reza, atensaun iha misa laran, la halimar, la han no hemu iha misa/ Kreda laran. Molok ba misa haris, hatais hena mos, tau sapatu. Laos ba misa hanesan ba halimar iha estrada ka iha kampo laran.

II

Jezús nia isin

Objetivo

Hatene katak hostia ne'e mak Jezús nia isin rasik

Komprende katak Jezús nia isin fo kbiit ba ema

La ba komunga ho sala

Prosesu

Orasaun: hodi Padre,

Hananu:

EH KRISTU MAK TENE ITA 171

***Eh Kristu mak tene ita, ita hakbesik Na'i nia mesa;
atu ba komunga nia Isin, Sakramentu domin.***

1. Maromak nia han mak tun hosi lalehan
atu halo raiklaran moris.
2. Se hakbesik Ha'u sei la hamlaha tan;
se fiar Ha'u sei la hamrook tan.
3. Ema la moris deit hodi aihan;
maibe hodi mos Maromak nia liafuan
4. Simu no hola ba, ne'e Ha'u nia Isin;
simu no hemu ba, ne'e Ha'u nia Ran.
5. Se hola Ha'u Isin no hemu Ha'u Ran,
nia sei moris ba nafatin.
6. Ita hotu hamutuk isin ida deit,
Ita bele hola han mesa ida deit. **89**

Don Bosco hanorin

Ba komunga beibeik. Ó sei deskobre saida mak lialoos nia kmanek! Komunga beibeik ne'e nu'udar airin ida tahan moris iha moral no mundo fisiku, prevene atu monu fiar ha'u, ha'u nia oan doben sira, ha'u la inventa no aumneta wainhira dehan komunga beibeik ne'e mak rai ida be metin, iha ne'ebe mundu nia rin hamrik metin iha leten, no devosaun ba Nain Feto mak airin seluk be tahan mundu nia rin.

- Don Bosco

Perguntas

1. Don Bosco nia liafuan badak ne'e, hanorin saida mai ita?

Katekese ba Oratorio

2. Tuir ó nia komprende mundo nia rin mak saida?
3. Moris iha moral mak moris oinsa?
4.

Evanjellu

Mt 26: 26-29

Eukaristia ba dala uluk

²⁶Wainhira sira han dau-daun, Jesus kaer paun, haraik bensa, silu hodi fahe ba nia eskolante sira dehan: “Simu no han ba: ne’e Ha’u nia isin.”

²⁷No Nia kaer kalis, fo tiha agradese, fo ba sira dehan: “Imi hotu, hemu ba: ²⁸ne’e Ha’u nia ran moruk foun nian nakfakar ba ema barak atu kasu sala. ²⁹Ha’u dehan ba imi: Ha’u sei la hemu tan fuan uvas ne’e to’o loron nebe Ha’u sei hemu fali nia hamutuk ho imi iha Ha’u Aman nia reinu.”

Perguntas

1. Sira han dadaun Jezús halo saida?
2. Waainhira Jezús fahe paun ba sira, dehan saida ba sira?
3. Jezús dehan, iha ne’ebé tan mak nia bele han hemu fali ho sira?
4.

Resumo

Iha Don Bosco nia hanorin hatoo mai ita, katak simu komunga ne’e hanesan rai ida be metin, be boot mai baku nia, la monu, katak brani atu kontra buat ne’ebé la loos nian. Exemplo, la bosok, domingo ba misa iha uma Kreda, se ema bosok ita atu halimar karik ita la ba ho sira, maibe ita ba Igreja atu reza, tuir misa ho maluk sira seluk.

Iha evanjellu ita rona Jezús nakfilak pão ba Nia isin no tua ba nia Ran, hafoin fo ba nia eskolante sira han no hemu. Ita sei kiik seidaok halo primeira kumuña karik ita la han no hemu Jezús nia Isin no Ran, maibe sira be halo primeira kumuña tiha ona ita hatene ona sai mak naran simu komunga ne’e.

Ema ne’ebé simu komunga ho laran mos sei hetan grasa, maibe ema simu komunga ho sala sei lakon Maromak nia grasa. Nune’e alin sira molok ba misa ita presisa atu prepara an didiak nune’e ita bele hetan Maromak nia grasa matenek nian, badinas nian, isin diak nian atu labele moras, nsst.

III Han hamutuk ho Jezús

Objetivo

Hatene katak iha misa, ita han hamutuk ho Jezús
Komprende katak misa ne'e ita selebra Jezús nia han dala ikus
Hatais diak wainhira mai misa

Prosesu

Orasaun: hodi Padre,

Hananu

DON BOSCO, AMI AMAN 409

1. Iha mundu oras ne'e susar barak duni.
Dala ruma ita tauk, tamba sa? La hatene!
La bele lakon esperansa tamba Na'i haraik mai ita
belun ida be fo tulun, hodi la'o hamutuk ita! **203**

*Don Bosco, ami aman, belun foinsa'e sira nian,
tau matan (ba) ita oan sira; lori ami ba lalehan!
Don Bosco ami aman, modelo ami nian,
dada ita oan sira habelun ho Na'i!*

2. Se ita hetan susar no ita lakon fiar,
lalika tauk ona, Iha ida hein ba ita.
Nia ita belun los, it'nia aman doben mos,
ida be hanorin ita atu la'o iha dalan los.

Istoria : Don Bosco nia lia menon

(Don Bosco husu ba nia oan sira katak, hadook an husi sasan mundo ne'e nian); hodi hadook an husi sasan mundo ne'e nian, ha'u hakarak dehan hadook an husi ksolok ne'ebé la loos nian, husi belun ne'ebé sentimental liu, no husi han-han no hemu ne'ebé lori imi ba kanten. Ha'u husu imi hadook an husi hatais furak ka lakan-lakan (badak) , basa hatais sira ne'e bele halo imi sai foti an ka dada ema nia atensaun ba imi nia an, dala ruma mos imi hanesan ema folin la iha. Se tebes susar ba ó atu hadook an husi buat hirak ne'e ha'u husu ba ó atu halo tuir manu fuik wainhira prepara an atu husik hela sira nia knuk. Sira ba iha sira nia knuk ninin, baku sira nia liras, no hakaas an atu semo. Sira koko sira nia kbiit.

Katekese ba Oratorio

Halo hanesan, baku imi nia liras, hakaaa-an atu hamriik sae ba lalehan. Keta koko ida ne'e iha ai-hun leten; keta halo imi monu tun ba rai. Keta, hahu ho buat kiik, ho buat ne'ebé importante ba imi nia salvasaun.

Ha'u hakarak imi usa liras spiritual rua ne'e: devosaun ba Santissimo Sakramneto no ba Nain Feto. Ho liras rua ne'e, ho devosaun ruaan ne'e, imi sei seguru, sei tulun imi, la kleur imi sei hamrik sae ba lalehan. Wainhira manu sira sai ona husi knuk, sira semo aas, laos semo tun. Halo hanesan. Konsente wainhira semo tun- ne'e mak, la halo devosaun rua ne'e ho mundo nia objetivo, hanesan atu manan ó nia superior (naiulun) sira nia estima ka lohi ó nia kolega sira. Ha'u sei haksolok liu se ha'u halakan ahi domin nian ne'e iha imi, ba Jezús iha Eukaristia. (santissimo Sakramneto).

- Don Bosco

Evanjellu

Mt 26: 17-25

Han kalan ba dala ikus

¹⁷Iha loron uluk festa Paun fermentu laek nian, nia eskolante sira ba husu Jesus; "Ita hakarak ami ba hadia ba Ita sasan atu han Paskua iha los nebe?" ¹⁸Nia hatan: "Ba hasouru ema ida iha sidade hodi dehan ba nia: 'Mestre dehan: 'Ha'u nia tempu besik ona; iha o nia uma mak Ha'u sei halo Paskua hamutuk ho ha'u nia eskolante sira.'" ¹⁹Eskolante sira halo tuir nudar Jesus haruka hodi hadia sasan ba Paskua. ²⁰To'o ona loraik, Nia tur iha meja hamutuk ho sira na'in sanulu resin rua. ²¹Wainhira sira han dau-daun, Nia dehan: "Tebes, Ha'u dehan ba imi; imi ida sei saran Ha'u." ²²Ho neon nakraik teb-tebes, sira ida-ida hahu dehan ba nia: "Keta ha'u karik, Na'i?" ²³Nia hatan: "Ida nebe hatama nia liman hamutuk ho Ha'u iha bikan, nia mak sei saran Ha'u." ²⁴Oan Mane tuir nia dalan nudar hakerek nanis ona kona ba Nia; maibe susar boot ba ema nebe saran Oan Mane ba mate: nia la moris karik kala diak liu!" ²⁵Judas, ida nebe saran Nia dehan; "Keta ha'u karik, Mestre?" Jesus hatan ba nia: "O rasik mak dehan."

Pergunta

1.... (animador mak halo)

Resumo

Iha Don Bosco nia liafuan sira hatoo mai ita atu brani hamrik sa'e ba lalehan. Ne'e dehan katak, la bele tanis bei-beik ba sasan ne'ebé folin

boot ama no apa sosa labele, lor-loron labele husu osan bei-beik, labele halimar osan hodi sosa ba sasan ne'ebé la folin (brikedus). Tulun ama no apa, iha uma, iha eskola rona mestre sira, halimar hamutuk ho maluk sira, sai belun diak ba malu, laos baku malu.

Tamba ema la rona, la halo tuir buat ne'ebé Jezús hanorin, nune'e nia tenki mate ba ita nia sala, hodi mate iha kruz. Iha evanjellu ita rona katak Jezús han dala ikus ho nia eskolante. Se mak hadomi nia belun ida, nia hadomi Jezús, se mak hadomi Jezús, nia sei hetan tulun husi Jezús.

IV Sai ida deit ho Kristo

Objetivo

Hatene saida deit ho Kristo ne'e mak oinsa
Komprende sai ida ho Kristo nia lalaok sira
Hadomi maluk sira hanesan Jezús halo

Prosesu

Orasaun: hodi Padre,

Hananu:

COMUNHAO E UNIÃO

220

*Comunhao é união e união com Deus;
comunhao é uniao e verdade,
nossas almas unidas se fundem
e as mãos se estreitam em paz. 114*

1. Na meja com Cristo me sentirei
e outro Cristo com Ele vou ser;
com meu irmão eu meu alegre no dia
e na noite com Ele sofrerei. (2x)
2. Minha alma unida a Deus com todo está,
quero ser testemunha e verdade
para todos os homens dispersos,
o Senhor quando em fim voltará. (2x)
3. Nenhum homen se afaste da tua forte voz
se convidas a humanidade
todos podem amar-Te também, Senhor

quando emfim para todos virá. (2x)

Istoria

Senhor Domingo no nia familia

Wainhira Timor funu, senhor Domingos no nia familia fahe malu. Senhor lori kilat nune'e nia tenki tiru malu ho inimigo, familia sira hela iha uma, forsa Indonesia kontrola tiha. Nune'e senhor Domingos no nia familia fahe malu. Oan sira balun ba eskola iha rai/ nasaun selu-seluk. Iha tinan ruma nia laran sira la hasoru malu.

Wainhira funu remata ona, mak oan sira fila mai iha Timor, ama buka apa, iha falintil sira leet, no oan sira mai buka nia ama no apa, iha uma. Kleur wain tebes familia ne'e fahe malu, la hamutuk nudar familia ida, hela keta-ketak, la hasoru malu. Ikus mai sira hetan malu, hakuak malu tanis, tamba kleur ona la hasoru malu, la hela hamutuk nu'udar familia ida.

Oras ne'e sira hamutuk fali, sai nu'udar familia ida be loos. Sira bele halibur hamutuk fali tamba sira mak mai husi aman no inan ida deit.

Perguntas

1. Saida mak mosu ba senhor Domingos nia familia?
2. Oan sira ba ne'ebe?
3. Tamba sa mak ikus sira bele hetan malu fali?
4. ...

Evanjelu

Jo 10: 22-30

Jesus fo sai katak nia Maromak Oan

²²Iha Jerusalem sira halo dau-daun festa dedikasaun templu nian iha tempu malirin. ²³Iha templu, Jesus la'o iha portiku Salomao nian. ²⁴Judeu sira haleu Nia hodi husu: "To'o wainhira O sei husik ami iha nakukun laran? O mak Messias karik, hateten los kedas mai ami." ²⁵Jesus hatan ba sira: "Ha'u hateten ona ba imi, maibe imi la fiar. Hahalok sira nebe Ha'u halo hodi Ha'u Aman nia naran fo sasin kona ba Ha'u, ²⁶maibe imi la fiar, basa imi la'os Ha'u nia bibi sira. ²⁷Ha'u nia bibi sira rona Ha'u nia lia; Ha'u hatene sira, no sira tuir Ha'u. ²⁸Ha'u fo ba sira moris rohan laek. Sira la lakon ba nafatin, no ema ida sei la hadau sira housi Ha'u nia liman. ²⁹Ha'u Aman, nebe fo sira mai Ha'u, Nia boot liu hotu; no ema ida la bele hadau sira housi Aman nia liman. ³⁰Aman ho Ha'u ida deit."

Perguntas

1. Judeu sira husu saida ba Jezús?
2. Jezús hatan saida ba Judeu sira?
3. Oinsa sa mak Jezús ho nia Aman sai ida deit?
4. ...

Resumo

Iha istoria ita rona, tiu Domingos, ho nia familia sira fahe malu, la hela hamutuk, sira ida-ida hela iha fatin ketak ba malu. Ema hirus sira nia papa karik mama la hatene oinsa bele defende papa, nune'e mos oan no ama. Labele defende malu tamba la hela hamutuk iha fatin ida/ uma ida nia laran.

Iha evanjellu ita rona, ema Judeu sira husu Jezús nia identidade (husu Jezús ne'e se loos) hodi dehan, O mak Messias karik, hateten los kedas mai ami." Jezús apresenta nia An kleur wain ona. Ida ne'e Jezús dehan nanis ona ba sira, maibe tamba sira la koho rona no lakohi fiar, too ikus sira sei husu nafatin. Ema la rona katak la fo atensaun wainhira ema ida koalia, la fo atensaun tamba la konsidera ema ne'e ita nia belun, ita nia maluk, ida husi ita, ita la koñese, nune'e la rona nia liafuan sira be nia koalia ne'e.

Ita be rona bei-beik Jezús nia hanorin sira ne'e, halo tuir Ninia hanorin sira, ita hadomi Jezús, ne'e dehan kata kita sai ida deit ho Jezús. Wainhira ita sai ida deit ona ho Jezús, la iha buat at ida iha mundo ne'e bele book ita ka halo ita terus, haketak ita husi Jezús.

V

Celebrasaun agradecemento

Objetivo

Hatene agradece ba vida ne'e

Komprenhe katak buat diak hotu ne'e mai husi Maromak

Buka agradece nafatin Maromak

Prosesu

Orasaun: hodi Padre,

Hananu

AGRADESE NA'I MAROMAK, AGRADESE

230

Agradese Na'i Maromak, agradese.

Maluk, ei, mai agradese. (2x)

1. Dadersan deit manu oan sira lian,
fo agradese Maromak, ita Na'i.(2x)
2. Beh, ema sira, tansa la mai,
fo agradese Maromak, ita Na'i.(2x)
3. Kiik oan no boot, riku no kiak,
hana'i, hahi Kristu, ita Maksoin.(2x)
4. Hot-hotu mai, hananu ho ksolok,
fo agradese Maromak, ita Na'i.(2x)

Historia: Hatoo obrigado tarde liu

Iha senhora ida, toba hela iha nia toba fatin, moras nian. Nia senhora ida laran diak liu, nia serbisu mak fase ropa, simu ema seluk nia ropa no fase, hodi ida ne'e mak nia fo han, hemu no eduka nia oan nain haat. Wainhira moras todan ona, nia hatene ona katak nia sei mate. Nia oan nain haat haleu hela nia nia toba fatin, ho matan ben. Nia oan boot dehan ba sira nia mama: "mama ami hotu hadomi mama. Ami haksolok katak ami iha inan ida hanesan mama. Mama nia diak ami sei lahaluha, iha ami nia moris tomak! Obrigado mama!"

Senhora ne'e, ho matan ben hatan, tansa agora deit mak ó dehan mama? Dehan tiha ne'e nia iis mos kotu.(PAM 206)

Perguntas

1. Senhora ne'e iha oan hira?
2. Oan boot hatoo saida ba nia mama?
3. Mama hatan saida ba nia oan?
4.

Evajellu Luk 17: 11-19

Ema moras lepra na'in sanulu

¹¹Jesus liu housi Galileia no Samaria atu ba Jerusalem. ¹²Wainhira nia tama dau-daun ba knua ida, ema moras lepra na'in sanulu mai hasouru Nia. ¹³Housi dook sira hasa'e lia dehan: "Jesus, mestre, sadia atan ami!" ¹⁴Hare tiha sira, Nia dehan ba sira: "Imi ba hatudu imi an ba amlulik sira." La'o tuir dalan, sira sai mos ona. ¹⁵Sira ida, hare katak nia isin diak fali ona, fila fali hodi hahi Maromak ho lia maka'as; ¹⁶nia taka oin ba rai besik Jesus nia ain hodi agradese. Ema ne'e Samaritanu ida. ¹⁷Jesus dehan

ba nia: “La’os ema na’in sanulu mak sai mos? Sira na’in sia iha nebe?
¹⁸Sira ida la fila mai atu fo gloria ba Maromak, mak ema malae ne’e
 deit?” ¹⁹Hafoin Nia dehan ba ema ne’e: “Hamriik, la’o ba! O nia fiar mak
 soi o!”

Perguntas

1. Wainhira Jezús atu tama dadaun ba Samaria, se mak mai hasoru
 Jezús no nain hira?
2. Sira husu saida ba Jezús?
3. Ema nain hira mak mai fali agradese?
4.

Resumo

Iha istoeia ita rona katak, senhora ida iha oan nain haat, senhora moras besik atu mate, mak nia oan ida dehan obrigado ba nia mama. Ita nudar oan tenki, dehan obrigado beibeik ba ita nia inan no aman, ba ita mestre, belun bin no maun sira. La beele hein sira atu mate mak ita dehan, se nune’e karik ita la hadomi, sira. Ita sei hamutuk buka hatudu domin ba malu, nune’e iha unidade be metin tebes, diabo mos la lebe sobu.

Iha evanjellu ita rona, iha ema moras nain sanulu hetan isin diak, ida deit mak mai fali husu obrigado ba Jezús. Lolos ita husu obrigado nafatin no bei-beik ba Maromak, ba ita nia moris rasik, ba ita nia mama no papa be Maromak prepara atu sira tulun ita iha buat ne’ebé ita la bele. Ba ita nia mestre no belun sira be tulun ita sai matenek no halimar ho ita.

Ba Maromak la para hatoo obrigado tamba ba diak hotu be ita simu no hetan iha ita nia moris, mai husi Maromak.

VI Hasae Sakrifisio

Hatene halo sakrifisio
 Komprende saida mak krifisio
 Buka hakaas-an hasa’e sakrifisio ba Maromak

Prosesu

Orasaun: Hodi Padre,

Hananu:

SAKRIFISIU BOOT LIU HOTU 273

1. Sakrifisiu boot liu hotu: Missa Eukaristia. (2x)
Kristu mak halo, husik mai ita, Ita atu halo tuir. (2x)
***Maluk sira, it'namkari ona; lori Maromak ba ita uma;
Hela hamutuk ho ita. (2x)***
2. Ita nia Missa hotu ona, fila ba uma ho ksolok. (2x)
Ita tatoli ba ema hotu-hotu Kristu nia liafuan. (2x)

Historia

Bispo Oscar Armulfo Romero husi sidade El Salvador, sai kuinesido tamba ninia moris ne'ebé buka atu defende comunidade no sosiedade liu-liu kiik no kiak sira. Nia la kole no baruk atu fo hanoin ba ukun nain sira ne'ebé ukun tuir sira nia hakarak deit hodi fo terus ba povo kiik no kiak sira. Hanesan baibain ukun nain sira ne'e la simu nia. Sira buka atu "hatun" nia.

Iha loron sigunda 24 Marco 1980, tiru mate Bispo Romero, ida be tiru nia ne'e ema selu nia. Ema tiru Bispo wainhira nia reza misa dadaun, no temi liafuan hirak ne'e; Nee Ha'u Nia Isin, saran ba mate tamba imi, ni ida nee Ha'u nia Ran nakfakar ba imi". Nia moris nakfilak ba sakrifio hasa'e ba Maromak iha Na'i nia altar. (PAM 477).

Perguntas

1. Bispo be ema oho ne'e naran sa?
2. Nia defende se mak ema hirus nia hodi oho nia?
3. Bospo halo hela saida make ma oho nia?
4.

Evanjellu

Mt 19: 16-30

Mane klosan riku

¹⁶La kleur mane ida hakbesik ba Nia dehan: "Mestre, ha'u sei halo buat diak sa atu hetan moris rohan laek?" ¹⁷Jesus husu ba nia: "Tansa o husu Ha'u kona ba buat nebe diak? Ida deit mak diak. Maibe, o hakarak tama ba moris karik, halo tuir ukunfuan sira ba." ¹⁸Nia husu fali: "Ukunfuan nebe?" Jesus hatan: "Keta oho, keta sala ho ema nia kaben, keta na'ok, keta foti lia falsu; ¹⁹hamtauk o nia aman ho inan, hadomi o nia maluk hanesan o an rasik." ²⁰Klosan ne'e dehan ba Nia: "Ha'u halo tuir ona buat ne'e hotu: ha'u sei halo tan sa ida?" ²¹Jesus dehan ba nia: "O

hakarak sai ema diak lo-los karik, ba fa'an tiha o nia sasan hotu hodi fahe ba ema kiak sira, nune'e o sei hetan rikusoi iha lalehan; hafoin mai tuir Ha'u."

²²Rona tiha lia hirak ne'e, mane klosan fila ho neon nakraik, basa nia iha rikusoi barak. ²³Tan ne'e Jesus dehan ba nia eskolante sira: "Tebes, Ha'u dehan ba imi: ema riku ida atu tama iha reinu lalehan susar. ²⁴Tebes, Ha'u dehan ba imi: lalais liu ba kuda kamelu ida tama iha daum nia kuak liu fali ema riku ida tama iha reinu lalehan." ²⁵Wainhira eskolante sira rona lia ne'e, sira hakfodak hodi dehan: "Nune'e se los mak bele soi an?" ²⁶Jesus fihir sira hodi dehan: "Ba ema sira, ne'e la bele; maibe ba Maromak buat hotu bele deit."

²⁷Tuir mai Pedro hasa'e lia dehan: "Be ami nebe husik tiha buat hotu hodi tuir Ita Boot: ba ami ne'e sa ida?" ²⁸Jesus dehan ba sira: "Tebes, Ha'u dehan ba imi: imi sira nebe tuir Ha'u, iha mundu foun, wainhira Oan Mane tur iha nia kadunan gloria nian, imi sei tur mos iha kadunan sanulu resin rua hodi tesi lia ba suku sanulu resin rua Israel nian. ²⁹Ema hotu nebe husik uma, maun alin, feton, aman, inan, oan sira ka rai, tan Ha'u nia naran, sei simu dala atus ida liu tan hodi simu mos nudar liman rohan moris rohan laek. ³⁰Barak nebe uluk, sei ikus fali; no sira nebe ikus, sei uluk fali

Perguuntas

1. Mane klosan ne'e husu saida ba Jezús?
2. Jezús hatan oinsa ba mane klosan ne'e perguntas?
3. Tamba sa mane klosa triste?
4. ...

Resumo

Imi foin rona katak ema oho, Bispo Romero wainhira nia halo Misa dadaun. Ema boot sira nasaun nian, hirus Bispo Romero, tamba nia defende ema kiik no kiak sira. Hodi defende ka protese kiak no kiik, nia tenki mate. Husi nia mate ne'e ema aprende hodi la halo tan povo kiik no kiak sira terus tan. Nia mate ba povo, hasai povo kiik no kiak nia terus.

Iha evanjellu dehan, foinsa'e riku, hanoin nia rikusoin, la koho tuir Jezús. Foinsa'e ne'e hanoin sasan liu fali Maromak be hakiak sasan ne'e.

Alin sira mai ita aprende, husi istoria hodi fo an ba ema seluk, katak mai iha oratorio buka halimar ho kolega sira be ema la iha maluk ho sira, karik sira tristi, tamba ema hirus sira, ita halo sira haksolok, hodi halimar ho sira, karik sira la iha maluk ita ba hamaluk sira, ita sai belun ba malu.

Katekese ba Oratorio

Aprende husi evanjellu, husik buat hotu, buka moris tuir ka halo tuir
Jezús nia hanorin, basa Jezús, Maromak Oan hatene nia emar sira nia
presisa, nia bolu ita ba ita nia diak. Husik buat hotu mundo ne'e nian buka
moris tuir Jezús.